

**Raja Muda Perlis Agih Jalur Gemilang Di Bazar Aidil Fitri  
Bernama  
13 Ogos, 2012**

KANGAR, 13 Ogos (Bernama) -- Raja Muda Perlis, Tuanku Syed Faizuddin Putra Jamalullail berangkat ke Bazar Aidil Fitri di Taman Sena Indah di sini lewat malam tadi dan menyampaikan Jalur Gemilang kepada para peniaga bagi menyemarakkan sambutan Bulan Kemerdekaan.

Baginda yang diiringi Raja Puan Muda Perlis, Tuanku Hajah Lailatul Shahreen Akashah Khalil turut beramah mesra dengan para peniaga bazar anjuran Persatuan Kelab-kelab Belia Malaysia (MAYC) Perlis itu.

Ketibaan baginda berdua disambut Pengerusi MAYC Perlis, Azhar Hassan yang kemudiannya mengiringi baginda berdua melawat kesemua 38 buah gerai pada bazar Aidil Fitri itu.

Bazar itu beroperasi setiap hari sejak 9 Ogos lalu dan akan tamat pada hari terakhir umat Islam berpuasa.

Sebelum itu baginda berdua menyertai umat Islam menyertai solat Isyak dan Tarawih di Masjid Al-Hussain, Kuala Perlis.

Masjid Al Hussain yang merupakan mercu tanda pelancongan yang baru bagi Kuala Perlis adalah satu-satunya masjid terapung di Perlis.

Ketibaan baginda ke masjid itu disambut oleh penasihat masjid, Tan Sri Mohd Ariffin Yusof dan Naib Canselor Universiti Malaysia Perlis (UniMAP), Prof Datuk Dr Kamarudin Hussin yang juga pengerusi masjid yang terletak berhampiran terminal feri Kuala Perlis itu.

Sementara itu pada sebelah petang semalam, Raja Muda Perlis menyertai program kayuhan santai dengan berbasikal sejauh 13 kilometer dari Masjid Batu Lima ke Kuala Perlis dengan turut disertai Ketua Polis Perlis, SAC Zull Aznam Haron.

Dalam program itu, baginda turut singgah di bazar Ramadan Kuala Perlis dan menyaksikan penyerahan buah kurma kepada dua buah masjid oleh Ketua Pegawai Eksekutif Majlis Agama Islam dan Adat Istiadat Melayu Perlis (MAIPs), Abdul Malik Hussin di kaunter zakat fitrah sementara yang diwujudkan di situ.

Dalam tempoh satu jam kaunter zakat fitrah itu beroperasi, MAIPs mengumpul sebanyak RM761 daripada umat Islam manakala Polis Perlis pula melaksanakan kempen cegah jenayah dengan mengedarkan risalah-risalah Rakan Cop di bazar Ramadan itu.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=687617>